

佛言：『舍利子，若諸菩薩遠離一切智智心，修空、無相、無願解脫門，是諸菩薩不攝受般若波羅蜜多，無方便善巧力故，便證實際取聲聞果或獨覺菩提。若諸菩薩不離一切智智心，修空、無相、無願解脫門，是諸菩薩攝受般若波羅蜜多，有方便善巧力故，能入菩薩正性離生位，得阿耨多羅三藐三菩提。』

※十六知見：我、眾生、壽命、生者、養育士夫、補特伽羅、意生、儒童 作者、使作者、起者、使起者、受者、使受者、知者、見者。

*（名數）又云十六神我，未見正道之人，於五陰等法中強立主宰，妄計有我我所，計我之心歷諸緣，即有十六知見之別：

一、我，於五陰等法中妄計有我我所之實，故名為我。

二、眾生，於五陰等法和合中妄計有實之眾生而生，故名為眾生。

三、壽者，於五陰法中妄計有我受一期之報命有長短，故名壽者。

四、命者，於五陰法中妄計我之命根，連續不絕，故名命者。

五、生者，於五陰法中妄計我能生起眾事，又我來生人中，故名生者。

六、養育，於五陰法中妄計我能養育他人及我生為父母所養育，故名養育。

七、眾數，於五陰法中妄計我有五陰十二入十八界等眾法之數，故名眾數。

八、人，於五陰法中妄計我為能修行之人，異於不能修行之人，及

我生於人道，異於餘道，故名人。

九、作者，於五陰法中妄計我有身力手足，而能任事，故名作者。

十、使作者，於五陰法中妄計我能使役他，故名使作者。

十一、起者，於五陰法中妄計我能起後世罪福之業，故名起者。

十二、使起者，於五陰法中妄計我能使他起後世罪福之業，故名使起者。

十三、受者，於五陰法中妄計我後身當受罪福之果報，故名受者。

十四、使受者，於五陰法中妄計我能使他受後世罪福之果報，故名使受者。

十五、知者，於五陰法中妄計我有五根能知五塵，故名知者。

十六、見者，於五陰法中妄計我有眼根能見一切之色相，故名見者。

出智度論二十五。

<摩訶般若波羅蜜經 卷1 習應品 3>

佛告舍利弗：『菩薩摩訶薩行般若波羅蜜時，應如是思惟：「菩薩但有名字佛亦但有字。般若波羅蜜亦但有字。色但有字受想行識亦但有字。」舍利弗！如我但有字，一切我常不可得。眾生、壽者、命者、生者、養育眾數人者，作者、使作者，起者、使起者，受者、使受者，知者、見者，是一切皆不可得。